

CENTRALNA BANKA BOSNE I HERCEGOVINE

Na osnovu člana 2. stava 3. tačke h, člana 7. tačke e, člana 39. i člana 42. Zakona o Centralnoj banci Bosne i Hercegovine ("Službeni glasnik BiH", br. 1/97, 29/02, 8/03, 13/03, 14/03 i 9/05) i odluke Predsjedništva Bosne i Hercegovine broj: 01-011-981-27/05 od 15. jula 2005. godine o dizajnu kovanog novca, Upravno vijeće Centralne banke Bosne i Hercegovine na 12. sjednici od 22. decembra 2005. godine, donosi

O D L U K U

o izdavanju, osnovnim obilježjima i puštanju u opticaj kovanog novca u apoenima od 5 Konvertibilnih maraka i 5 Feninga

1. Centralna banka Bosne i Hercegovine (u daljem tekstu: Centralna banka) izdaće kovani novac u apoenima od 5 Konvertibilnih maraka (u daljem tekstu: KM) i 5 Feninga, kao zakonito sredstvo plaćanja u Bosni i Hercegovini.

2. Kovani novac u apoenu od 5 KM izradiće se u dvometalu: unutrašnji prsten nikl-mesing (Cu 70%, Ni 5,5%, Zn 24,5%), vanjski prsten bakar-nikl (Cu 75%, Ni 25%), a od 5 Feninga od legure čelika presvučene niklom.

3. Apoeni kovanog novca iz tačke 1. ove odluke biće okruglog oblika i imaće slijedeće tehničke karakteristike:

1) apoen od 5 KM – masu 10,33 grama (unutrašnji prsten 4,55 grama, vanjski prsten 5,78 grama), prečnik 30,00 milimetara (unutrašnji prsten 17,80 milimetara, vanjski prsten 29,59 milimetara) i nazubljenu ivicu debljine 1,95 milimetara;

2) apoen od 5 Feninga – masu 2,70 grama, prečnik 18,00 milimetara i nazubljenu ivicu.

4. Izgled lica apoena kovanog novca iz tačke 1. ove odluke je slijedeći:

1) kod apoena od 5 KM u sredini je brojčana oznaka vrijednosti, a ispod brojčane oznake vrijednosti nalazi se slovna oznaka "KM".

Oko brojčane oznake vrijednosti ispisan je naziv "Bosna i Hercegovina" unutar vanjskog prstena i to desno od brojčane oznake vrijednosti, naziv "Bosna i Hercegovina" ćirilicom, a lijevo latiničnim pismom, koji su razdvojeni sa dva trokuta.

2) kod apoena od 5 Feninga u sredini je brojčana oznaka vrijednosti u pozadini koje se nalazi mapa Bosne i Hercegovine.

Oko brojčane oznake vrijednosti ispisan su riječi "Feninga" tako da su iznad brojčane oznake vrijednosti riječi "Feninga" ispisane latiničnim, a ispod ćirilicom pismom.

Oko riječi "Feninga" ispisan je naziv "Bosna i Hercegovina" tako da je iznad brojčane oznake vrijednosti naziv "Bosna i Hercegovina" ispisan ćirilicom, a ispod latiničnim pismom, između kojih se nalaze znakovi trokuta.

Između riječi "Feninga" i naziva "Bosna i Hercegovina" nalaze se tri koncentrična kruga, a između naziva "Bosna i Hercegovina" i okvirne linije nalaze se tačkice u nizu.

5. Izgled naličja apoena kovanog novca iz tačke 1. ove odluke je slijedeći:

1) kod apoena od 5 KM u sredini je golub sa grančicom masline u kljunu, a iznad goluba nalazi se brojčana oznaka "2005".

Unutar vanjskog prstena ispisan je naziv "Bosna i Hercegovina" i to desno od goluba naziv "Bosna i Hercegovina" ćirilicnim, a lijevo latiničnim pismom koji su razdvojeni sa dva trokuta.

2) kod apoena od 5 Feninga u sredini je trokut, a paralelno njegovoj lijevoj strani proteže se red zvijezda petokraka i lijevo od trokuta nalazi se oznaka "2005".

Oko trokuta ispisan je naziv "Bosna i Hercegovina" tako da je iznad trokuta naziv "Bosna i Hercegovina" ispisan latiničnim, a ispod ćirilicnim pismom, između kojih se nalaze znakovi trokuta.

Između trokuta i naziva "Bosna i Hercegovina" nalaze se tri koncentrična kruga, a između naziva "Bosna i Hercegovina" i okvirne linije nalaze se tačkice u nizu.

6. Kovani novac iz tačke 1. ove odluke staviće se u opticaj u 2006. godini, a precizan datum će odrediti i objaviti guverner Centralne banke u sredstvima javnog informisanja.

7. Ova odluka stupa na snagu danom objavljivanja u "Službenom glasniku BiH", a objaviće se i u "Službenim novinama Federacije BiH", "Službenom glasniku Republike Srpske" i "Službenom glasniku Brčko Distrikta BiH".

UV broj: 157/05
22. decembra 2005. godine
Sarajevo

Predsjedavajući
Upravnog vijeća Centralne banke
Bosne i Hercegovine
G U V E R N E R
Kemal Kozarić